


# NIJSBERICHTEN

## VAN



# STICHTEN

Oktober 2025

RIJKSWEG WEST 83, 9608 PB WESTERBROEK

## SOAMENSTELLEN BESTUUR

Doagelks bestuur:

Veurzitter: ds. Klaas Pieterman, Nijkerk ('t Hogeland)

Siktoares: Klaas de Vries, Westerbrouk

Puutholder: Siebe Gorter, Oethoezen

Aander leden: Greta Huis, Loppersom  
ds. Marten de Vries, Winzum  
Koos Wiersma, Lains.

**OKTOBER 2025**  
**JOARGANG 34 – NUMMER 68**

Redaksie  
& Vörmgeven                      Henke van der Veen

Redaksie-adres                      vanderveenh@ziggo.nl

Giroreken                              NL48 INGB 00031843 45

    t.n.v Liudgerstichten

**IENHOLD**

Eerste woord – Klaas Pieterman .....	4
Nijs van siktoares – Klaas de Vries .....	5
Nijs puutholder .....	6
Einfach Bibel – Fré Schreiber.....	7
Om bosschop – Ingeborg Nienhuis.....	8
Grunneger Dainsten .....	8

## EERSTE WOORD

21 September is haars begund. Dat is n mooi joargetiede, leste appels plukken, leste vruchten van t land hoalen en noadenken over aigen vruchtdroagen. Noatuur is ons nait allain n beeld van opkomen-gruien-riepen-vruchtdroagen, mor wie binnen zulf noatuur dij dat proces deurmoaken, allain duurt t bie, noar we hopen, meerdere joaren, dat we oetindelk vrucht droagen.

Ien kerken wordt dankstond holden of n oogstdainst vierd, aal of nait mit n oogsttoavel.

Ien november binnen der alderhande activiteiten: 29 november is t GRN-festival op t Hoogzaand.

Ien bibliotheken wordt Moivember holden mit kiender en heur olders/oppas. Der is n lesbraif bie over Alies ien Wonderlaand. (boukhandel/uitg. Vliedorp)

1 okt t/m 31 dez is tentoonstellen Alies ien vilt ien bibliotheek Lains.

En nait te vergeten:

18 okt Liudgerdag ien Johannes de Deuperkerk ien Hoezng/Huizinge, veur begunstegers, donateurs en verder veur elkenain. Vrij tougang.

Ien dizze Nijsberichten vien je verder wat van Fré Schreiber, Ingeborg Nienhuis, nijs van siktoares en n bericht van puutholder.

**Klaas Pieterman**

---

## KOPIJ

t Volgende nummer van Nijsberichten komt as ales goud gaat, weer oet ien meert 2026.

As ie wat te melden hebben, den kin ie dat sturen noar t redaksie-adres: [vanderveenh@ziggo.nl](mailto:vanderveenh@ziggo.nl). Joen biedroage is welkom!

## NIJS VAN SIKTOARES

Beste Lezers,

Even bieproaten over zoaken dij der goande wazzen, binnen en kommen.

### **Wat der was:**

Wie hebben as voltalleg bestuur op 22sten september vergoaderd. Gelukkeg kon veurzitter domie Klaas G. Pieterman vergoadern weer veurzitten en dat ging hom goud of. Zowel Klaas as wie hebben ons doarover verwonderd en ons der ook mit dankboarheid over verheugd. Wie hebben t had over 45e Fryske tsjinst yn t Grinzer lân dij holden is ien Aizing op 18den maai. t Martinikerkkoor kon deur, t plöstseling oet tied kommen van heur dirigente Marijke van Zanten-Boers nait aan mit doun. Wie kieken mit dankboarheid terug op de aangenoame menaaiier woarop wie voak soamenwaarkt hebben. t Gemengdkoor Canto Libre oet Boetenpost kon gelukkeg mitwaarken aan dainst. Op zich was t n mooie dainst mor der kommen hoast gain minsken op of woar of dat ainglieks veur bedould is. Wie hebben doarom besloten om organisoatie doarom nait weer op ons te nemen. Biebel is oetverkocht. Boukhandel Riemer is ien gesprek mit oetgever Jongbloed om te kieken of der meugelkhaid is om Biebel as “Printing on demand” oet te geven. Vroag aan joe as lezers is, mochten ie n moal n Biebel tegen kommen dij “over” is om dij aan ons beschikbaar te stellen want wie kriegen der nog geregeld vroag noar. Wat lopt: Beriemenskemizzie : Slept, zee veurzitter. Het te moaken met autersrechtenkwestie. Doarnoast wer noam van Janka Rubingh nuimd dij joarenlaank hail actief west het ien beriemenskemizzie. Heur gezondhaid gaat schaande genog nogal achteroet. Vertoalen dat zit der veur heur nait meer ien. Der binnen leste tied wat goud 60 nije laiden vertoald, mor dij binnen nog nait te zain op website omdat auteursrechten nog nait veurnkander binnen. Wie onderzuiken meugelkhaid om n selectie oet te geven ien de vörm van klain boukje. Ons website: Dij is kloar en is weer ien gebruik. Aaltied even weer wennen aan nij spul dat wel. Geluden dij wie der over heuren klinken goud gelukkeg. Kiender houkje: Fré schreiber verzörgt ook dit moal weer n kiender houkje. Fré is ien Duutslan tegen n boukje aanlopen mit titel Einfach Bibel. Ien t kienderhoukje komt Fré doar zulf over aan t woord.

**Wat Komt:**

Liudgermerreg: Op 18den oktober willen wie ien Hoezen (Huizinge) weer Liudgermirreg holden woar ie weer hartlek welkom binnen, zeker as ie begunsteger binnen. Reint Wobbes zel der wat vertellen over kerk en dörp, Barbara de Beaufort over kerkelijke gemainte en cantor/örgelist Kees Stekete over t örgel. Mirreg wordt ofsloten mit n vesper woaraan cantorij mitwaarkt. Om 13.30 uur is ienloop en t begunt om 14.00 uur. Vesper begunt om 16.00 uur

Kerstdaag: ien Oostum 24 december 2025 om 23.59 uur Veurganger is domie Jan Hommes oet Glimmen. Willem Tjebbe Oostenbrink is vroagd of hai wat veuroagen wil oet aigen waark. En CMV Excelsior oet Bavvelt zel we vroagen of zai weer mitwaarken willen.

Doar hebben wie ale vertrouwen ien en goie ervoerens mit. Noatied is der kovvie mit wat der bie.

Bestuurs vergoaderen: Op 19den jannewoarie 2026 hopen wie weer bestuursvergoaderen te holden ien Oskerd. t is ook muite weerd om hier ais even te kieken <https://erfgoedpartners.nl/agenda/> Kin mor zo wat veur joe bie wezen. Op bestuursvergoadern lait bestuurslid Greta Huis nog waiten dat zai op 17den november promovieren gaat aan Universiteit van Amsterdam. Prachteg toch? Wie wenssen Greta staarkte en haile schiere dag.

Wie wenssen joe n goie tied van haars tou en gezegende feestdoagen.

Groutnis en achten,

**Klaas de Vries – siktoares Liudgerstichten**

---

**Nijs van Puutholder:**

Puutholder Siebe Gorter het op zich nait zo veul te melden, mor hai stuurde wel even n QR code om joen begunstegersbiedroage mit over te moakenmocht dat er nog nait van kommen wezen. Trouwens dat mag ook wel gewoon zoas ie dat went binnen deur het over te moaken op Giroreken NL48 INGB 00031843 45 t.n.v Liudgerstichten



## Einfach BIBEL

Ik was ien julimoand op vekaanzie ien Duutslaand, ien Sauerlaand om dudelk te wezen. Wie huurden Ferienwohnung van Karl Josef Weide ien kontraain van Winterberg. Dat was meroakel en je konden der prachteg kuiern. Mor dat was nait veur mie bestemd dit joar. Ik haar last van bursitis, n sliembeursontsteken ien mien rechterbain.



Bie daag kon ik dat nog wel haarden, mor snaachts dee mie dat gloepende zeer, zo zeer dat ik der mor naauw van sloopen kon. Ik lag wakker en dreumde mit ogen open.

Dij daag haar ik ien n boukhandel ien Winterberg west en doar lag n dikke stoapel mit nije bouken: Einfach BIBEL. n Oetgoave van Deutsche Bibel Gesellschaft, bestemd veur jeugd, 180 prachtege, nait al te stoere verhoalen ien kleuren en fleuren, haard kaft, 400 bladzieden, 17,5 x 24,5 sentimeter en dit joar oetkommen. Wat zag dat ter geweldeg oet! En din begunnen roadern te draaien. Wie hebben ien t Grunnegers n biebel veur wozzen mensen, n kienderbiebel, mor niks veur bongeljoaren. Is doar din behoefte aan? Dat is mor net vroag. Je zain ze mor naauw meer ien kerk. Mor van 800 mensen dij der ien zeuventeger joaren sundoagsmörns ien Middelsom ien kerk zaten, is ook nog mor n koppeltje van over. Mout je t doarom loaten?

Want dat is mien plan. Ik wil dat prachteg bouk vertoalen en aanbaiden aan Liudgerstichten, ien hoop dat dij t oetgeven en verspraaiden willen. Doar mouten wie vanzulm eerst toustemmen veur hebben van Duutse oetgever. Din mouten wie onnaaiern mit Grunneger oetgever of dij dat zitten zigt. Wat veul belangrieker is, woar hoalen wie senterij vot, want t kost n bult geld en dat is betuun.

Ook doar haar ik ien mien dreum n oplözzen veur. Liudgerstichten schrift ale kerken ien ons pervinzie aan, mit bedoulen van ons plan, n veurbeeld en zuks. Dat t belangriek is en aal dat meer. Op t end vroagen ze of kerk n gift geven wil, om dit veur nkander te krieggen. Ales is ja welkom en wie doun der aksie bie veur t bouk. As dat aalmoal kloar is kin k begunnen. Ogen begunnen mie swoar te worden van t prakkezaaiern en van dij mooie dreum en ik vaal ien sloap.

**Fré Schreiber**

## OM BOSSCHOP

Geern struun ik mit n luk karke deur gaangpoaden. As lutje karkes mit vlagjes derboven op binnen, vuil ik mie eefkes vergrèld. Din wacht ik net zo laank tot n aander kiend ain weerombrengt, al mout ik doarveur onder t tougaangspoortje deurkroepen. Zo wait t woagentje dat ik der mien best veur dou. Vot bie t fruit is ain van mien laifste hörntjes. Doar maag ik n banaan votpakken, morzo, vergees, en dij smoakt mie aaltied beter din dij ik thoes krieg. Schil gooi ik zulf deur t loekje bie greunteweegschoal, en din vrog ik mie aal moalen òf of doar meschain n swientje woont. Worreltjes ien plastic puutjes magen nait meer mitdoun. 'Dij binnen ja schrapt!' Ik knies om mien mames bak, al heb ik dij voaker heurd. Van aal dat longern noar worst en kees achter glaas wor ik gammel, en ain van de haarde stoetjes veur t mirregeten mörgen proat ik te papieren puut oet. 'Goud om denken dij aal òf te reken domt.' Joa, mamme. Vla dij ik t laifste eet maag bie mie ien t karke, dij saaie dingen dij wie neudeg binnen, doar huf ik ja nait mit te sjaauwen. Kovviemelk, keukenrol en korenwien... wel zuks opbedenkt kin der mooi zulf mit lopen. Mamme treft weer n proater, dat ik kin maank riest en soep n wedstried runnen tegen mien onzichtboare vrundje. Flink help ik mit bosschoppen op baand te kriegen. Bovenhands waark, mor ik maag t geern doun. t Wotter lopt mie al ien mond van wat wie vanoavend eten zellen. En hou dat pak sukkeloadesprits ien mien karke komen is? Gain idee. Aander moal help ik vannijs mit, aans kin mamme niks worden mit dij pakkellarrie.



*bron:brgfx op freepik*

**Ingeborg Nienhuis**

---

## GRUNNEGER DAINSTEN

---

### Oktober 2025

26	10.30 uur	Lutherse Kerk Amsterdam Spui
----	-----------	---------------------------------

### December 2025

24	23.59 uur	Kerstnachtdainst Oostum	domie Jan Hommes
----	-----------	-------------------------	------------------